

SANTIAGO

Tiya Huesësicohua'ini Santiago Toyase'e

¹ Yë'ë Santiago, Maija'quëre cui'ne Ējaë Jesucristore necaiquëpi pëpayë, Israel doce tsëcapëa acohua'ipi jai hue'ña hua huesëni pa'icohua'ire.

Maija'quë Tq'ñe Asayere Isiye

² Maija'quë do'ijë, jaiye ai yo'oyepi cui'ne co'aye ëayepi mësaruna t̄i'a maca sihuajë'ë. ³ Mësarupi tsoe asayë, ja ai yo'oyepi cui'ne co'aye ëayepi mësarupa'ire paji cuasayere neñañe a'ë. Jaje pa'ina, ja neñañepi quëcoco-hua'i pa'iyere neji. ⁴ Nequëna, quëcosicohua'i pa'ijë nuñe pa'icohua'i cui'ne carase'e peocohua'irepa de'oye pa'iyë.

⁵ Mësarupa'ire pa'ini ta'ñe cuasajë yo'oyere carasico-hua'i pani sejë'ë, Maija'quëni. Seto Maija'quëpi isija'quë api, ta'ñe cuasajë yo'oyere. Maija'quë cato si'aohua'ire ta'tëpo ti peoyerepa cui'ne ti ëseye peoyerepa isiquë api. ⁶ Jaje pa'iquëta'are señe pa'iji, isire paja'quë api cuasajë ti jëa coeye peoyerepa. Jëa coequë cato jai jaira tutupi ju'aquëna, co'poco ñese sani cui'naopi co'ye daio yo'oyeje pa'i api. ⁷ Jaje pa'i cato ina Maija'quë isija'quë api cuasama'ë pa'ijë'ë, ⁸ iye mu'se yeque cuasasiquëpi ñamina'a yequere cuasaquëpi, ocue pa'i macarepa pa'ima'quë cato.

⁹ Maija'quë do'iquëre teaye pa'ini Maija'quëpi jerepa pa'ire necaina, asaquë sihuaye pa'iji. ¹⁰ Cui'neje jaiye co'amaña paquëni Maija'quëpi teaye pa'ire necaina, asaquë sihuaye pa'iji. Jaiye co'amaña paquë cato taya jorohué jumuse'eje pa'i api, tsoe quëcoye peoquë api. ¹¹ Jaje pa'ina, jaiye paquëpi i cuasaquë yo'ora'ase'ere jeoni esa ju'iquë api, jorohué maca jumusico airepa ëse ëoquëna,

cuñeni de'oye ña cuañoñe carajaini me'meni tomeñeje pa'ye.

Neñañe Cui'ne Co'aye Nēiñe

¹² Neñañere quëcoquë taima'quëpi sihuaquë api. Jaje pa'ina, neña tējisi maca ti pa'i marore isi cuañoja'quë api, Maija'quëre oicohua'ire isisi'i ca nēose'ere. Ja do'ire sihuaquë api. ¹³ Mësaruru aquëpi co'ayere yo'o ëaye nēiñe pa'ito cuasama'ë pa'ijë'ë, Maija'quëpi co'aye yo'o ëaye nēiñe neji, cajë. Maija'quë cato co'aye yo'o ëaye nēiñe asama'quë api. Cui'ne paipi co'ayere yo'ojajë caquë co'ayere yo'o ëaye nēiñe nema'quë api. ¹⁴ Pa'i cato io-hua'ipi co'ayere yë do'ire johua'i yëyepi quërë saquëna, co'aye yo'oyena taicohua'i a'ë. ¹⁵ Pa'i cuasayepi, pa'i co'ayere yëyepi tsj ëtapëje pa'io de'oni tayo yo'oyere joyeje pa'ye etoco. Etona, tayo yo'oyepi ai de'o huesëni yureta'a juni huesëyere joyeje pa'ye neco.

¹⁶ Coso cuaño'ma'pë pa'ijë'ë, Maija'quë do'ijë maña. ¹⁷ Si'aye maire de'oyerepa isise'e cato ma'tëmopi Maija'quë isise'e a'ë. Ja isiquë cato si'aye ma'tëmo miacohua'ire de'huasiquë api, tiñe pa'i ponëma'quë api, cui'ne si'a tēcahuëa tēto saina, cui'neje pa'iquë api. ¹⁸ Ise'e te'i jaje yo'osi'i cuasani maire nuñerepa coca quëayere asani sehuojëna, pa'iyere isipi, maipi du'ru macarepa quëise'ejë pa'iohua'i huajë sëcapë huëocohua'i pa'ijajë caquë.

Nuñerepa Pa'iyë

¹⁹ Jaje pa'ina, Maija'quë do'ijë maña. Si'aohua'i mësaruru cui'ñasicohua'ire papi yecohua'i cayere esa asajë'ë. Jaje pa'iquëta'are coca cayere esarepa cama'pë pa'ijë'ë. Cui'ne esa pëtitema'pë pa'ijë'ë. ²⁰ Pëtitesiquë cato Maija'quë nuñerepa yo'oyere yo'oma'ë pa'iji. ²¹ Jaje pa'iyë sëte si'si yo'oye pa'iyë cui'ne jaiye co'ayepi mësarute timë huesoni pa'iyere jëcojë'ë. Jëconi teaye pa'iohua'i

maña'ë cuasajë de'lo coca mësarü joñoana tase'ere pajë'ë. Ja coca cato mësarü joñoa huaso tutu paye a'ë.

²² Maija'quë coca asani iti cayeje pa'ye neñe pa'iji. Nema'pë coa Maija'quë cocase'e asajë pa'ini co'ye coso cuãñosicohua'i pa'iyë. ²³⁻²⁴ Jaje pa'ina, Maija'quë coca quëayese'e asaquëpi iti asase'eje pa'ye yo'oma'quë cato tsiña de'huana me pa'i a'ni caquë i tsia ñani se ponëni sai tsoe huãñeyeni me pa'i pate'ni cuasayeje pa'i api. ²⁵ Jaje pa'iquëta'are nuñerepa pa'icohua'ire cui'ne tsea cuãñoma'cohua'ire ne cocare asani i asase'ere huãñeyema'quëpi iti cuãñeñere ocue pa'i macarepa yo'o tijaquë pa'iquëpi sihuaja'quë api, i yo'oyere.

²⁶ Maija'quëre tija'si'i caquë yo'oquëre pa'ë cuasaquëpi i tsemeñore nau nëcoma'quë pani ija'a co'ye cosoji. Cosoquëna, i Maija'quëre tija'si'i caquë yo'oyepi ti coçai ma'ñe pa'iji. ²⁷ Jaje pa'ina, Maija'quë pai nuñerepa pa'iye cato iye a'ë: yëhuiohua'ire coçaiye, hual'jeohua'i ai yo'ojëna, coçaiye, cui'ne iye yeja si'si yo'oyere pu'pema'cohua'irepa pa'iye a'ë.

2

Si'a Yë'quë Maca Yo'oyere Ye'yaye

¹ Mësarü Maija'quë do'ijëpi mai de'lo Ëjaëre pare Jesucristore sehuocohua'ipi paire sahuajë te'ohua'ise'ere de'oye yo'oma'pë pa'ijë'ë. ²⁻³ Jaje pa'ina, yeque mësarü tsi'si sitona dati'ñe pa'i api, te'e jai do'i curi ju'i ca'huaro moñore ju'iquëpi, jai do'i cañare suñasiquëpi daina, cui'ne yequëje curi peoquë teaye pa'ije ai ju'i care ju'i dati'ñe pa'i api. Daina, mësarupi cayë, du'ru daiquëre de'lo caña ju'iquëre: “Da ja'rujë'ë, ico de'lo ñu'i saihuëna.” Jaje cajëta'a yequëni co'amaña peoquëni teaye pa'ini cayë: “më'ë cato ja macare nëcaquë ñajë'ë. Panita'a cayë peo yejana ja'runi ñu'i ñajë'ë.” ⁴ Jaje yo'oni tsoe pai yo'oyere

ñaquë ca tēji ējaēje pa'i de'ohuë. De'oni co'aye cuasayepi sa'ñe mēsaruja'a sahuajē yo'oyë.

⁵ Yē'ë yēcōhua'irepa Maija'quë do'ijē iyere asajē'ë: Maija'quēpi iye yeja co'amaña peocōhua'ire sahuani i tsecōhua'ire nepi. Jaōhua'ipi jaiye co'amaña payeje pa'ye Maija'quë pa'ire paji cuasayere pajē cui'ne ite oico-hua'ire isisi'i ca nēosi co'amañare pajajē caquë. ⁶ Jaje pa'iquēta'are mēsarupi co'amaña peocōhua'ire teaye pa'iohua'ire co'aye yo'oyë. ¿Jaiye co'amaña pacōhua'i pa'i ma'ñe mēsarū ñato mēsarute tea ju'iñeje yo'ojē pai ējaōhua'i quē'rona quērē sacōhua'i? ⁷ Cui'ne jaōhua'ipi yēquë mēsarute de'o hue'yosi mamirepa Jesure co'aye sañope cacōhua'i a'ë.

⁸ Mēsarupi Maija'quë coca cñañese'ejē pa'ye mē'ë quēno maca pa'iquēre oijē'ë, mē'ēja'a co'ye oiyeje pa'ye case'ere si'a yē'quë maca yo'o tī'ani nuñerepa de'oye yo'oyë. ⁹ Jaje pa'iquēta'are mēsarupi paire sahuajē te'ohua'ise'ere de'oye yo'ocōhua'i pani co'aye yo'oyë, Maija'quë cñañese'ejē pa'ye yo'oma' do'ire. ¹⁰ Jaje pa'ina, te'i paipi iye cñañese'ere si'aye de'oye yo'oquēta'a te'o cñañese'ere tayosiquë pani tsoe si'aye tayosiquë pa'iji. ¹¹ Jaje pa'ina, jare ipi Maija'quēpi capi: “Yequë emēre, panita'a nomiore yo'oma'pē pa'ijē'ë, huejasicōhua'i.” Cui'ne capi: “Paire huani jeoma'pē pa'ijē'ë.” Jaje case'ere asani yequë nomiore, panita'a emēre yo'oma'cōhua'ipi ja yē'ta'a paire huani jeocōhua'i pani tsoe cñañese'ere sehuoma'quë pōnēpi. ¹² Mēsarū si'aye yo'ose'e iñoñe pa'iji, Cristo yēyere yo'oye panita'a co'ayere. Jaje pa'ina, de'hua ñajē'ë, mēsarū cuasaye cui'ne neñe. ¹³ Ai yo'ocōhua'ire oima'pē pa'isicōhua'ire cato oiye peosipi yecōhua'i oisicōhua'ise'e de'oye tī'aja'cōhua'i a'ë, i Maija'quë pai yo'ose'ejē pa'ye ñaquë de'huasipi.

Nema'pē Cocase'e Caye Co'aji

¹⁴ Maija'quë do'ijë Maija'quëre pa'iji cuasaquë a'ë. ¿Caquëta'a ja yë'ta'a nese'e ti peoquëre iquere co-caiquë'ni, i cuasaye? ¿Jaje pa'ire i cuasase'epi ite huasoye pa'iquë? ¹⁵ Cañu'u, Maija'quë do'iquëni, panita'a Maija'quë do'iconi caña cui'ne mu'se ai ja'ñe caraquëna. ¹⁶ Mësarü aquëpi caji: “Señaquë de'oye pa'ijë'ë. Ca'nequë cui'ne si'aye më'ë yëye ai pa'ijë'ë.” Jaje caquëta'a ti isiye paji, ite carayere. ¿Iquere jaje pa'ito coca co-caiquë'ni? ¹⁷ Jaje pa'ina, ju'isi co'amañaje pa'ye a'ë, Maija'quë pa'iji cuasayepi coa pa'ini, nese'epi peoto.

¹⁸ Te'i paipi ca'ñe pa'i api, ñeje: “De'oji, më'ë cato Maija'quë pa'iji cuasayese'e payë, nese'e peoquëpi. Jaje pa'iquëta'are yë'ë cato nese'ere payë.” Jaje pa'ina, yure yë'ëre iñojë'ë, më'ë Maija'quëre pa'iji cuasayere nese'e peoyepi. Yë'ëpi më'ëre iñosi'i, Maija'quë pa'iji cuasayepi yë'ë nese'ere. ¹⁹ Më'ë Maija'quëre tel'i pa'iji cuasaquë pa'iyë ai de'oji. Jaje cuasani më'ë tayoma'ë pa'iyë. Jaje pa'iquëta'are huatìohua'ijë cui'ne cuasayë. Cuasajë ca'rajë tsasijë pa'iyë. ²⁰ Jaje pa'ina, Maija'quëre pa'iji cuasajëta'a nema'pë pa'ito ju'isi co'amaña pa'iji, do'i peoye cuasayepi. Jaje pa'ina, ña sëtajë'ë, huesë pa'ima'ë pa'ija'quë. ²¹ Ñajë'ë, mai aire Abrahamre Maija'quëpi nuñe pa'iquëre ca huesopi, i mamaquë Isaacre huani jëosi'i caquë yo'osi do'ire. ²² Jaje pa'ina, më'ë ñañë, Abraham i yo'ose'epi Maija'quë pa'iji cuasayere iñose'e. Jaje yo'oquëna, Maija'quë pa'iji cuasayepi coa yo'o jujase'e peoye etapi. ²³ Jaje yo'oquëna, Maija'quë coca toyase'e cayepi ti'api: “Abrahampi Maija'quëre pa'ire paji cuasa do'ire Maija'quëpi ite nuñe pa'iquëre pare ca huesopi.” Jaje pa'ina, Maija'quë cajeire hue'yosiquë paji'i, Abraham.

²⁴ Jaje pa'ina, mësarü yure ñañë, Maija'quë pa'iji cuasaquë yo'oquëni nuñe pa'iquëre ca huesoye. Coa Maija'quë pa'iji cuasayese'epi nuñe pa'iquë ca hueso cuañöñe

peoji. ²⁵ Jaje pa'ina, Rahab co'a nomiore Maija'quëpi nuñe pa'icore ca huesopi, Josué jëjo saosicohua'ire pëaja'to isico cui'ne yequë ma'aja'a yahue jëjo saosi do'ire. ²⁶ Jaje pa'ina, paipi joyore peoquë pani tsoe ju'isiquë pa'iji. Jaje pa'ye cui'ne Maija'quë pa'iji cuasayepi yo'oye peoto ju'ise'epi pa'iji.

3

Cayere Ye'yaye

¹ De'oji, Maija'quë do'ijë mësarupi tsoe asacohua'i a'ë, yecohua'ire se ye'yacohua'ipi jerepa iohua'i yo'ose'e ña de'hua cuaño ja'ñe pa'ie. Jaje pa'i do'ire mësaruru acohua'ipi jai pairepa pa'ima'pë pa'ijë'lë, yecohua'ire se ye'yacohua'i. ² Si'aohua'i tayocohua'ise'e pa'iyë. Jaje pa'iquëta'are te'i paipi i coca cayere ti tayoma'quë pani nuñe pa'iquëre papi jaje pa'i pani, si'aye i pa'ie nuñerepa ñaquë pa'iquë api. ³ Mai cuañeñe caballopi de'oye sehuocaijaquë cajë yë'opona quëna tarapëre jua nëcoghua'i a'ë. Jaje neni yureta'a si'aëre de'oye po'nejë sacohua'i a'ë. ⁴ Ñajë'lë, cui'ne jai yohuë yo'oyere. Ai tutu jëayerepa ju'aquëta'are iti tayoco a'ricona iti tayoquëpi po'nequëna, i yë hue'ñana saicoa. ⁵ Jaje pa'ye mai tsemeñoje a'rico macata'a jai co'amañare cacao. Jaje pa'iopi a'ri toa macata'a jai airo tsëni ëoyeje pa'yerepa yo'ocoa. ⁶ Jaje pa'ina, tsemeño cato toaje pa'io, co'aye ne tuture timësi-coa. Jaje pa'iopi mai capëre pa'io si'a capë co'aye neñe pa'iji, cui'ne si'a mai pa'i ma'aje co'a de'huacoa, mëna tutupi ioni pa'i do'ire. ⁷ Iye yeja pa'icohua'ire nëcoghua'ire, pi'are, añaohua'ire, cui'ne jai tsiaya pa'icohua'ireje, si'aye paipi tseani de'oye ye'yacohua'i a'ë. ⁸ Jaje pa'iquëta'are tsemeño cato ye'ya ti'añe peocoa, nau nëco ti'añe peocoa. Co'acoa. Tsïmaoje pa'iopi si'aye co'a de'huayere timësicoa. ⁹ Jaje pa'ina, iopi Maija'quëre de'oquëre pa'ni

cajē sihuajē, cui'ne jare iopi paireje co'acohua'i a'ë cayē, Maija'quēpi ije pa'iohua'ire de'huasicohua'ireje. ¹⁰ Jare iti yē'opopi etaji, de'oye cacaiye, cui'ne yecohua'ire co'aye cayeje. Jaje pa'i ma'ñe a'ë, Maija'quē do'ijē, jaje yo'oye ai co'aji. ¹¹ Te'e oco cojeja'a de'o oco etacona, sēje ocoje cui'na etama'coa. ¹² Maija'quē do'ijē, mēsaru ñato ¿Higuerapi hui'yape ne care quēiñe pa'iquē, panita'a cuiya'ipi higuera care quēiñe pa'iquē? Jaje pa'ina, ti peoji, te'e oco cojeja'a de'o oco cui'ne asi oco etaye.

Maija'quē Tā'ñe Asaye Isiye

¹³ Jaje pa'ito, mēsaru aquēpi tā'ñe pa'ipi asa ti'asiquē pani iyere i de'oye yo'oquē pa'iyepi cui'ne ja tā'ñe asayepi teaye pa'ire nequēna, nesi co'amañare iñoja'quē. ¹⁴ Jaje pa'iquēta'are mēsaru joyore yecohua'i payere ëa ñajē pēiñepi cui'ne ai jerepa pasi'i cuasajē yo'oyepi pa'ina, tā'ñe cuasayē caye cato coa cosoye a'ë, cui'ne ti tā'ñe asayere pare coa cayeje pa'ye neñe a'ë. ¹⁵ Jaje pa'ye pa'ima'coa, Maija'quē tā'ñe asayerepa. Ja asase'e cato iye yeja pai cuasani huēose'e a'ë cui'ne pai capē yēyepi huēose'e a'ë, cui'ne huati huēose'e a'ë. ¹⁶ Jaje pa'ina, yecohua'i payere ëa ñajē pēiñepi cui'ne ai jerepa pa'i pasi'i cuasayepi pa'ito si'aye ne tiya saose'eje pa'yepi pa'iji, coa si'aye co'ayere yo'oyepi. ¹⁷ Jaje pa'iquēta'are Maija'quē tā'ñe asaye isiye cato co'ayena co'me ma'ñe a'ë. Jaje pa'ina, jo'cua pa'iyē, dahuēre pa'iyē, yecohua'i cuasayere meñe ñañe peoye pa'iyē, yecohua'ire teaye ñani coçaiye, jaiye de'o co'amañare neñe, si'a yē'quē maca si'aohua'ire yo'oye, cui'ne nuñerepa pa'icohua'ire neñe a'ë. ¹⁸ Jaje pa'ina, jo'cua de'oye pa'ijajē cajē yo'ocohua'i cato jo'cua de'oye pa'i ja'ñere neñē. Ja yo'ojēna, tase'e mēani quēiñeje pa'ye quēquēna, nuñerepa yo'oyere tēja'cohua'i a'ë.

4

Iye Yeja Ayere Ēa Ñañe

¹ ¿Jeropi daquë'ni, sa'ñe huajo huaiye, cui'ne mësaru-ja'a sa'ñe pëti coca caye? Ja cato mësaru sa'nahuëpi etapi, co'aye yo'o äaye nëiñepi mësaru sa'nahuë uihuaquë pa'iyepi. ² Jaje pa'ina, mësaru yëyere ti'ama'pë pa'i do'ire yecohua'i payere äa ñajë, huani jeojë yo'ojë, mësaru yëyere ti'añu'u cajë yo'ojë uihuayë, mësaru. Mësaru yëye ti'ama'pë pa'iyë. Maija'quëni isijë'ë cajë sema' do'ire. ³ Jaje pa'ina, mësarupi seni isi cuañone pañë, mësaru co'aye yëyere yo'ojë nejañu'u cajë se do'ire. ⁴ Nějore pacohua'ipi yequë nomioni yo'ocohua'ijë pa'iohua'i a'ë, mësaru. Huesëye mësaru iye yeja ayere äa ñajë oicohua'i pani Maija'quëre oima'cohua'i de'ojë, ite sañope yo'ocohua'i pa'iyë. Jaje pa'ina, iye yeja ayere äa ñajë oicohua'i cato Maija'quë cajeohua'i peoyë, Maija'quëre sañope yo'ocohua'i a'ë. ⁵ Jaje pa'ina, Maire isisi joyopi iye yeja ayere oima'pë pa'ijë'ë, caquë ai oi ësequë ñacaiji, maire. Jaje toyase'e cani coa cama'ë pa'iji, care paji. ⁶ Jaje pa'iquëta'are Diusu maire oi cöcaiquë api. Jaje pa'ina, toyase'e caji: “Maija'quë cato teaye pa'iohua'ini oi cöcaiquë api, jerepa pa'iohua'i a'ë cuasacohua'ire cato cöcaiye paquë api.” ⁷ Maija'quëna mësaru pa'iyë isisicohua'irepa pa'ijë ise'ere necaijë'ë, huati yëyere necaima'pë. Jaje yo'ojëna, ña jujani mësarute jeoni huë'huëjaquë api. ⁸ Maija'quëna tsiojaijë'ë, ipi mësaruna tsiojaija'quëre. Co'aye yo'ocohua'i tëno tojë'ë, mësaru jëñare si'si pa'iyë. Maija'quëre oñu'u cajëta'a iye pa'iyë se oijë yo'ocohua'ipi ja si'si pa'iyë tsoa tojë'ë, mësaru joñoare. ⁹ Otare papi oijë ai co'a ju'ijë'ë, mësaru co'aye yo'ose'ere cuasajë. Mësaru sose'epi ota pönëjaquë cui'ne mësaru sihuayepi oiyena pönëja'quë. ¹⁰ Jaje pa'ina, Maija'quë ña hue'ñare pana

teaye pa'iohua'i de'ojë'ë, ipi mësarute jerepa pa'iohua'ire neja'quëre.

Yequë Tayoyere Ñaquë Cama'ë Pa'ijë'ë

¹¹ Maija'quë do'ijë, sa'ñe mësaruja'a co'aquë api cama'pë pa'ijë'ë. Jaje pa'ina, Maija'quë do'iquëre co'aquë api caquë cato cuañese'e cayere co'aji caji, ipi cuañese'e meñe ña ëjaë de'oni. Jaje pa'ina, më'ëpi cuañese'e cayere co'aji caquë pani iti cuañese'ere sehuoma'ë pa'i coa më'ë-ja'a co'ye ñani ca tëji ëjaëje pa'i de'oyë. ¹² Te'i pa'iji, cuañese'e paire isiquë. Jare i api, tayose'e ñani ca tëji ëjaërepa. Cui'ne jare jaëse'e pa'iji, huasoye paquë, cui'ne nejoñe paquë. ¿Jaje pa'ito më'ë iquei macapi më'ë cajei tayoye ñarojai caquë'ni?

Ñamina'a Pa'i Ja'ñe Huesëjë Caye

¹³ De'oji, yure iyere asajë'ë. Yure panita'a ñamina'a ja daripëna sani jaron a te'e ometëcahuë pa'ijë co'amaña nejë isijë curi neñu'u, cacohua'i maña. ¹⁴ Ñamina'a mësar u pa'i ja'ñe huesëyë. Mësar u cato picoja'a pa'isicot a'a peo hue'ña tiya saiyeje pa'iohua'i a'ë. ¹⁵ Jaje pa'ina, mësar u cato ñeje caye pa'iji: “Ëjaëpi yëna huajëcohua'i pa'ijë iye maña nesi'i panita'a ja yequë co'amañaje nesi'i caye pa'iji.” ¹⁶ Jaje pa'iquëta'are mësar u cato si'a tuturepa cacohua'i a'ë, pa'ire payeje nëina. Si'aye jaje jerepa pa'iohua'ire nëina, tutu caye co'aye a'ë. ¹⁷ Jaje pa'ina, de'oye yo'oye asaquëpi ja yë'ta'a de'oye yo'oma'ë pani tsoe co'aye yo'opi.

5

Jaiye Co'amaña Pacohua'ire Quëaye

¹ Iye jaiye co'amaña pacohua'i asajë'ë. Oijë'ë cui'ne cuijë'ë, mësar u ai yo'o ja'ñere asa quëquëjë. ² Mësar u jai do'i co'amaña tsoe ja'juse'e a'ë cui'ne de'o ju'i cañaje

pu'jupi ani huesose'e a'ë. ³ Mësaruru oro cui'ne curiquëje yoco ne huesëse'e a'ë. Jaje yoco ne huesëyepi iñoji, mësaruru co'aye yo'oyere. Jaje pa'ina, japi mësaruru capëa toa ëoyëje pa'yerepa peo hue'ña ëo huesoja'coa. Mësaruru tËji mu'sëñare pare jaiye co'amaña de'huani teaye payë. ⁴ Mësaruru tsiña co'amaña necohua'ire saïma'pë pa'ise'epi yure mësarurute sañope iñoji. Iñoquëna, Èjaërepa tutu quë'ipi iohua'i nesi do'ire saijë'ë, cayere asapi. ⁵ Iye yeja pa'i maca mësaruru de'o hue'ñare pare pa'ijë si'aye mësaruru yëyere yo'ojë sihuajë paë'ë, duruhuequë hui'yape jujuyëje pa'ye jujuhuë. Jaje pa'ina, yure mësarurute huai mu'sëña ti'api. ⁶ Mësarurupi huani jeohuë, ti co'aye yo'oma'cohua'ini, co'acohua'i a'ë cajë, mësarurute sañope yo'o tutu ti peocohua'ini.

Yo'o Jujahuë Cama'pë Quëcojë Uteye

⁷ De'oji. Maija'quë do'ijë. Mësaruru cato yo'o jujahuë cama'pë quëcojë utejë'ë, Èjaë dai macaja'a, tsio taquë je'quë oco tëcahuëare utequë pa'iquë a'ë, ocosi maca tase'epi mëani quëcona tëasi'i caquë. ⁸ Jaje cui'ne mësarurujë quëcojë ocue pa'i macarepa pa'ijë'ë, mai Èjaë daiye ti'a tËji do'ire. ⁹ Maija'quë do'ijë mësarurujala sañe jaë do'ire ai yo'oyë cajë pëti coca cama'pë pa'ijë'ë, Maija'quëre nejo cuañoñe pañu'u cani. Tsoe caca sa'rore pa'iji Diusu pai yo'ose'e ñani ca tËji ëjaërepa. ¹⁰ Jaje pa'ina, Maija'quë do'ijë ye'yejë'ë, Maija'quë yëye quëacai do'ire tsoe acohua'i ai yo'ojë quëcose'ere. ¹¹ Ai yo'onije quëcosicohua'ire mai cato cayë: ai sihuacohua'i pa'iyë, jaohua'i cato. Mësarurupi Job ai yo'oquë quëcose'e cui'ne tËji hue'ñana Maija'quë ite coçaise'e asacohua'i a'ë. Jaje pa'ina, Maija'quë cato, teaye ñani oi coçaiyepi ini pa'iyë sëte coçaija'quë api.

¹² Maija'quë do'ijë, mësarü cayepi do'i quë'ye pa'ijaquë cajë Maija'quëna se ca col'ijajë care payë cama'pë pa'ijë'ë. Jaje pa'ina, nuñerepa cajë'ë, yecohua'i asajëna. “Jaje pa'iji” casicohua'i pani, jare “jaje pa'iji” case'e pa'ijaquë, cui'ne yecohua'i asajëna, “pañë” casicohua'i pani, jare “pañë” case'e pa'ijaquë. Jaje yo'onita'a mësarü nejo cuañoñe paja'cohua'i a'ë.

Jujucaija'quë Api, Asajë Señe

¹³ Mësarü aquëpi ai yo'oquë pani Maija'quëre seja'quë, mësarü aquëpi sihuaquë pani Maija'quëre sihuaquë jëjë-ja'quë. ¹⁴ Mësarü aquëpi ju'iquë pani sehuosicohua'i ëjaohua'ini soija'quë, mai Ejaë mamipi cajë secacaija'cohua'ire, hui'yapëpi dojë. ¹⁵ Maija'quëpi ju'iquëre jujuja'quë api. Ta'ñe cuasajë seto ju'iquëpi co'yaja'quë api. Co'aye yo'osiquë pa'itojë i co'aye yo'ose'ere sai de'huacaise'e pasipi. ¹⁶ Jaje pa'ina, tayo yo'ose'ere pai ñape yecohua'ina se quëajë, pai ñape yecohua'ire secacaijë'ë, Maija'quëre si'aohua'i juju cuañosicohua'i pañu'u cajë. Jaje pa'ina, nuñe pa'iquëpi Maija'quëre seña cato ai tutu pa'iji, yecohua'ire coçaiye. ¹⁷ Jaje pa'ina, tsoe aquë Maija'quëre quëacaiquë Elías maije pa'ipi ocoma'o pa'ijaco caquë Maija'quëre sequëna, toaso ometëca cui'ne jopo ocoye paço, iye yeja. ¹⁸ Paçona, cui'naëpi Maija'quëre ocojaco caquë sequëna, oco ocona cui'naopi, yeja de'oye mëaco de'o.

¹⁹⁻²⁰ Maija'quë do'ijë, mësarü aquëpi nuñerepa yo'o ma'are hua saquëna, yequëpi, de'o ma'ana cui'naëni ne co'ya coquë pani jutira'siquëni huasoji, cui'ne jaiye i co'aye yo'orojaise'ere sai de'hua cuañoji.

Maija'quë Huajë Ca Nëose'e
New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 14 Jun 2022 from source files dated 13 Jun 2022

995e68c5-fe57-54e6-bf8e-0637526d3f7d